

STATUTI I PARTISË


ALEANCA *për* SHQIPTARËT

Në bazë të nenit 16 të Ligjit për partitë politike të Republikës së Maqedonisë së Veriut ("Gazeta zyrtare e RM-së, nr. 76/04, 76/04, 5/07, 8/07, 5/08 dhe 23/13) dhe propozimin e Kuvendit themelues të ALEANCA PËR SHQIPTARËT, të miratuar në **Kongresin e Parë**, mbajtur më **10 mars të vitit 2018**, plotësim ndryshimeve të miratuara në bazë të nenit 58 pika 1 të Statutit në **Kongresin e Dytë**, mbajtur më **27 mars të vitit 2022**, si dhe plotësim ndryshimeve të miratuara në bazë të nenit 54 pika 1 të Statutit në **Kongresin e Tretë** të Jashëzakonshëm, mbajtur më **24 dhjetor të vitit 2022** u soll ky:

STATUT

DISPOZITAT THEMELORE

Neni 1. Ky statut është garanci e fuqishme që sovraniteti rrjedh nga baza partiake dhe i takon anëtarësisë së gjerë të ALEANCA PËR SHQIPTARËT.

Neni 2. Me këtë statut rregullohen:

1. Emri dhe shkurtesa e Partisë;
2. Selia e Partisë;
3. Simbolet e Partisë;
4. Objektivat e veprimit politik;
5. Transparenca në funksionim dhe mënyra e të vepruarit;
6. Kushtet dhe mënyra e anëtarësimit, ndërprerja e anëtarësimit, si dhe të drejtat, obligimet dhe përgjegjësitë e anëtarëve;
7. Përfaqësimi dhe prezantimi i Partisë politike;
8. Organet e Partisë dhe dispozitat e funksionimit të saj;
9. Përfitimi dhe menaxhimi me mjetet e Partisë;
10. Ndërprerja e veprimit politik, si dhe posedimi i pasurisë në rast të shuarjes së Partisë.

EMRI DHE SHKURTESA E PARTISË

Neni 3. Emri i Partisë është "ALEANCA PËR SHQIPTARËT".

Neni 4. Shkurtesa e Partisë është ASH.

SELIA E PARTISË

Neni 5. Selia e ALEANCËS PËR SHQIPTARËT është në Tetovë, ndërsa zyra alternative e selisë është në Shkup.

SIMBOLET E PARTISË

Neni 6. ALEANCA PËR SHQIPTARËT ka vulën në formë rrethi, vulën katrore, emblemën, flamurin dhe himnin e Partisë.

1. Vula në formë të rrethit përmban në gjysmën e sipërme emrin ALEANCA PËR SHQIPTARËT – Tetovë, ndërsa në gjysmën e poshtme qëndron shkurtesa ASH dhe në mes emblema.
2. Faksimilen e ka në formë të katërkëndëshit me tekstin: ALEANCA PËR SHQIPTARËT – Tetovë, me vendin e rezervuar për numrin e protokollit dhe datën.
3. Teksti i vulës dhe faksimilja është e shkruar në gjuhën maqedone dhe shqipe.
4. Emblema ka formën e drejtkëndëshit, ngjyra bazë e së cilës është vjollcë, me shqiponjën dykrerëshe si simbol me ngjyrë të verdhë në mes. Në pjesën e poshtme të simbolit të shqiponjës është teksti ALEANCA PËR SHQIPTARËT.
5. Emblema e ALEANCËS PËR SHQIPTARËT duket si në Figurën 1.



Figura 1. Emblema Primare

6. Flamuri i ALEANCËS PËR SHQIPTARËT ka formën e drejtkëndëshit me proporcione 5:3. Ngjyra bazë e flamurit është vjollcë. Në mesin e flamurit gjendet emblema (Figura 2).



Figura 2. Proporcionet e Flamurit 5:3 (gjërësi - lartësi)

Neni 7. ALEANCA PËR SHQIPTARËT është parti politike që nëpërmjet formave demokratike dhe paqësore të veprimit synon sigurimin, mbrojtjen dhe avancimin e të drejtave kolektive të shqiptarëve dhe komuniteteve të tjera në Republikën e Maqedonisë së Veriut në të gjitha sferat e jetës shoqërore.

ORIENTIMI IDEOR I ALEANCËS PËR SHQIPTARËT

Neni 8. ALEANCA PËR SHQIPTARËT është parti e qendrës së djathtë.

Neni 9. Koncepti bazë në ndërtimin e shtetit është koncepti liberal mbi parimet e demokracisë konsensuale.

ANËTARËSIMI

Neni 10. Anëtarësimi në ALEANCËN PËR SHQIPTARËT bëhet në bazë vullnetare.

Neni 11. Kandidatët e interesuar për anëtarësim në ALEANCËN PËR SHQIPTARËT plotësojnë deklaratën e anëtarësimit.

Neni 12. Deklarata e anëtarësimit përmban këto të dhëna:

1. Emrin dhe mbiemrin,
2. Numrin e vendvotimit,
3. Adresën e vendbanimit,
4. Kontaktet (telefonin fiks, celularin dhe adresat elektronike),
5. Nivelin arsimor të anëtarit,
6. Shënimin që ai pranon të kontribuojnë për përcaktimet statutare dhe programore të Partisë dhe mban përgjegjësi për mosrespektimin eventual të tyre.

E DREJTA E ANËTARËSIMIT

Neni 13. Të drejtë anëtarësimi në ALEANCËN PËR SHQIPTARËT kanë të gjithë qytetarët e moshës mbi 18 vjeç, të cilët:

1. I pranojnë përcaktimet statutare dhe programore të Partisë,
2. I pranojnë parimet bazë të veprimit politik demokratik,
3. Shprehin gatishmëri për të kontribuar në mënyrë të ndershme për realizimin e përcaktimeve statutare dhe programore të Partisë.

NDALESAT PËR ANËTARËSIM

Neni 14. Anëtarë të Partisë nuk mund të jenë personat:

1. Veprimet e të cilëve janë në kundërshtim me kodeksin etik të Partisë.
2. Persona për të cilët ka dëshmi materiale se merren me aktivitete kriminale dhe të ngjashme.
3. Persona që janë anëtarë aktivë të partive të tjera politike të regjistruara në Republikën e Maqedonisë së Veriut.

NDËRPRERJA E ANËTARËSIMIT

Neni 15. Ndërprerja e anëtarësisë bëhet në mënyrë vullnetare ose si rezultat i largimit nga struktura partiake.

Neni 16. Në rast të çregjistrimit vullnetar, anëtari përkatës i Partisë dorëzon në Nëndegë deklaratë për ndërprerje të anëtarësisë në Parti.

Neni 17. Në rast të përjashtimit për shkak të mosrespektimit të obligimeve të anëtarit, nëndega zyrtarisht informon anëtarin për arsyet e përjashtimit.

Neni 18. Anëtari i përjashtuar në afat prej pesëmbëdhjetë ditësh pas marrjes së vendimit për largim ka të drejtë të dorëzojë ankesë pranë Kryesisë së Partisë, vendimi i së cilës është përfundimtar.

Neni 19. Anëtarët e Partisë që bëhen anëtarë aktiv të partive të tjera të regjistruara në Republikën e Maqedonisë së Veriut me automatizëm konsiderohen se e kanë ndërprerë anëtarësinë në ALEANCËN PËR SHQIPTARËT.

Neni 20. Në rast të mospagimit të anëtarësisë për periudhë dymbëdhjetë mujore pa ndonjë arsyetim të qëndrueshëm, Partia rezervon të drejtën e ndërprerjes së anëtarësisë.

TË DREJTAT E ANËTARIT

Neni 21. Anëtarët e ALEANCËS PËR SHQIPTARËT i kanë të drejtat vijuese:

1. Të jenë të informuar për aktivitetet e organeve dhe trupave partiake,

2. Të zgjedhin dhe të jenë të zgjedhur në organet dhe trupat partiake;
3. Të marrin pjesë në të gjitha mbledhjet publike të Kuvendit të Nëndegës, përkatësisht të Degës së Partisë;
4. Të shprehin mendimet dhe qëndrimet e veta në mbledhjet e organeve partiake, anëtarë të së cilës janë;
5. Të japin vërejtje për veprimin e organeve të Partisë dhe funksionarëve të zgjedhur të saj;
6. Të dorëzojnë iniciativa pranë organeve partiake;
7. Të kërkojnë përkrahjen e strukturave partiake në rast të cenimit të integritetit dhe dinjitetit personal dhe familjar si rezultat i veprimit politik.

OBLIGIMET E ANËTARIT

Neni 22.. Anëtarët e ALEANCËS PËR SHQIPTARËT kanë obligimet vijuese:

1. Të marrin rregullisht pjesë në mbledhjet e organeve dhe trupave ku janë anëtarë,
2. Të paguajnë anëtarësinë,
3. T'u përmbahen dispozitave statutare dhe programore të Partisë,
4. Në takime partiake të sillen në pajtueshmëri me Kodeksin etik të Partisë.

ORGANET E PARTISË POLITIKE

Neni 23. Organet e ALEANCËS PËR SHQIPTARËT janë të klasifikuara në disa nivele:

1. Niveli i përgjithshëm:
 - a) Kongresi,
 - b) Kryetari i Partisë,
 - c) Kuvendi i Partisë,
 - d) Kryetari i Kuvendit,
 - e) Kryesia e Partisë,
 - f) Akademia,
 - g) Asambleja e Gruas,
 - h) Forumi Rinor,
 - i) Këshilli mbikëqyrës,
 - j) Komisioni statutar,

- k) Komisioni i kuadrove të Partisë
2. Niveli i mesëm
- a) Kuvendi i Degës,
 - b) Kryetari i Degës,
 - c) Kryesia e Degës,
 - d) Asambleja e Gruas e Degës,
 - e) Forumi Rinor i Degës,
 - f) Këshilli mbikëqyrës i Degës,
 - g) Komisioni i kuadrove të Degës.
 - h) Këshilli i Degëve të Shkupit i ASH-së
3. Niveli lokal
- a) Këshilli i Vendvotimit,
 - b) Kuvendi i Nëndegës,
 - c) Kryetari i Nëndegës,
 - d) Kryesia e Nëndegës.

Neni 24. Strukturimi i organeve të ALEANCËS PËR SHQIPTARËT bëhet në bazë të organogramit të përpiluar në bazë të respektimit të parimeve vijuese:

1. Parimi i përfaqësimit të barabartë të regjioneve,
2. Parimi i moslejimit të diskriminimit në përfaqësim në organet partiake në bazë gjinore, moshe, sociale dhe formave të tjera,
3. Parimi i promovimit dhe avancimit të demokracisë brenda partiake, bazuar në Statutin e Aleancës për Shqiptarët si një nga veçoritë kyçe të ALEANCËS PËR SHQIPTARËT,
4. Parimi i respektimit të kriterëve të meritokracisë si një nga shtyllat kryesore mbi të cilat bazohet funksionimi dhe veprimi i ALEANCËS PËR SHQIPTARËT,
5. Parimi i balancimit të autorizimeve midis niveleve dhe organeve të ndryshme me qëllim të kultivimit të drejtësisë dhe vendosjes së mekanizmave për të parandaluar çdo mundësi për keqpërdorim nga funksionarët e zgjedhur partiakë dhe shtetërorë.

KONGRESI

Neni 25. Organi më i lartë i Partisë është Kongresi.

1. Kongresi I ASH-së numëron nga 650 deri më 700 delegatë,
2. Në këtë numër përfshihen edhe delegatët e diasporës,

3. Delegatët e Kongresit propozohen nga ana e kuvendeve të Nëndegëve, ndërsa delegohen nga Kuvendi i Degës sipas kritereve të parapara me rregulloren për konstituim dhe veprimin e Kongresit.
4. Numri i delegatëve të Kongresit përcaktohet sipas numrit të votuesve shqiptarë që gravitojnë në Degët gjegjëse,
5. Secila Nëndegë e ALEANCËS PËR SHQIPTARËT detyrimisht përfaqësohet me një delegat në Kongres,
6. Në vendbanimet ku ALEANCA PËR SHQIPTARËT nuk ka Nëndegë, më tepër Këshilla Vendorë delegojnë një delegat në Kongres.

Neni 26. Kongresi mund të zhvillojë seanca të rregullta dhe të jashtëzakonshme.

Neni 27. Kongresi mund të sjellë vendime të plotfuqishme nëse në mbledhje marrin pjesë më së paku 1/2 e delegatëve nga përbërja e tij.

Neni 28. Me punimet e Kongresit deri në momentin e zgjedhjes së Kryesisë së punës udhëheq Sekretari i Përgjithshëm.

Neni 29. Seancat e rregullta të Kongresit mbahen çdo katër vjet.

Neni 30. Seanca e rregullt e Kongresit thirret nga ana e Kuvendit të Partisë me autorizim të Kryetarit të Partisë, në afat jo më pak se tre muaj para ditës së mbajtjes.

Neni 31. Seancë e jashtëzakonshme obligative e Kongresit thirret në rastet në vijim:

1. Me kërkesë të Kryetarit të Partisë
2. Me kërkesë të 2/3 të përbërjes së Kuvendit të Partisë.

KOMPETENCAT E KONGRESIT

Neni 32. Kongresi i Partisë ka kompetencat vijuese:

1. Miraton Statutin dhe ndryshimet e Statutit,
2. Miraton programin dhe veprimet kryesore të Partisë,
3. Përcakton vizionin për zhvillimin e Partisë,
4. Miraton raportin e organeve dhe trupave të Partisë,
5. Në përputhshmëri me rregulloren për punë të Kongresit zgjedh me votim të fshehtë anëtarët e Kuvendit të Partisë,
6. Në përputhshmëri me rregulloren për punë të Kongresit zgjedh me votim të fshehtë Kryetarin e Partisë,

7. Me shumicë 2/3 bën shkarkimin e Kryetarit të Partisë,
8. Me propozim të Kuvendit të Partisë bën emërimin e Kryetarit të nderit të Partisë,
9. Me shumicë 2/3 sjell vendim për shpërbërje të Partisë ose bashkimin e saj me ndonjë parti tjetër,
10. Themelon këshillin e nderit të Partisë,
11. Miraton Kodin Etik të Partisë,
12. Sjell rregulloren për punën e Kongresit,
13. Përcakton emrin dhe vendos për ndryshim të emrit të Partisë,
14. Përcakton emblemen dhe vendos për ndryshim të emblemes së Partisë,
15. Përcakton himnin dhe vendos për ndryshimin e tij,
16. Përcakton flamurin dhe vendos për ndryshimin e tij,
17. Në përputhje me rregulloren për punë të Kongresit formon trupat punues të tij,
18. Deleton kompetenca të trupat dhe organet e tjera të Partisë deri në mbledhjen e ardhshme të Kongresit,
19. Sjell akte të tjera të përcaktuara me këtë Statut.

Neni 33. KONGRESI I PARTISË të gjitha vendimet i sjell me votat e shumicës të delegatëve të pranishëm, me përjashtim të rasteve kur me këtë Statut është përcaktuar që vendimet të merren me 2/3-tat e votave të anëtarëve të Kongresit.

Neni 34. Mënyra e punës së Kongresit përcaktohet me rregulloren për punën e tij.

Neni 35. Të drejtat, obligimet dhe përgjegjësitë e Kongresit në rrethana të jashtëzakonshme i kryen Kuvendi i Partisë.

KRYETARI I PARTISË

Neni 36. Kryetari i Partisë është lideri i Partisë.

KOMPETENCAT DHE PËRGJEGJËSITË E KRYETARIT TË PARTISË

Neni 37. Përveç dispozitave të përshkruara te përfaqësimi dhe prezantimi i Partisë politike, Kryetari i ka edhe të drejtat dhe përgjegjësitë vijuese:

1. Kryetari i Partisë formon kabinetin e tij në përbërje:
 - a). Shefi i kabinetit,
 - b). Përgjegjësi i protokollit,
 - c). Këshilltarë nga fusha të ndryshme,
 - d). Shofer
 - e). Personel për siguri dhe rend.
2. Propozon 30 anëtarë të Kuvendit të Partisë, duke respektuar parimet e nenit 24.
3. Thërret mbledhjet dhe udhëheq me punën e Kryesisë së partisë.
4. Emëron kryesuesin e Këshillit të Degëve të Shkupit.
5. Në rast të vërtetimit të shkeljeve statutare dhe programore nga ana e Degëve ose Nëndegëve, Kryetari i Partisë i propozon Kryesisë së Partisë suspendimin e tyre dhe në të njëjtën kohë i rekomandon Kuvendit të Partisë shpërndarjen dhe emërimin e përbërjes së re, të përkohshme, të tyre.
6. Kryetari i Partisë ka të drejtë që vendimet e organeve dhe trupave partiake që janë në kundërshtim me dispozitat statutare, programore dhe mënyrën demokratike të veprimit t'i nxjerrë për diskutim para Kuvendit të Partisë. Vendimi i Kuvendit të Partisë në këtë rast është përfundimtar.
7. Kryetari i Partisë i dorëzon raport Kongresit të Partisë për funksionimin e Partisë midis dy mbledhjeve të Kongresit.

ZGJEDHJA E KRYETARIT TË PARTISË

Neni 38. Kryetari i Partisë zgjidhet me mandat 4-vjeçar me të drejtë edhe për një rizgjedhje.

Neni 39. Kryetarin e Partisë e zgjedh Kongresi me propozim të komisionit kandidues.

Neni 40. Për të shpallur një anëtar i Partisë kandidaturën për kryetar partie, duhet të sigurojë minimum 400 nënshkrime të anëtarëve të verifikuar të Partisë, me kusht që mos i takojnë një dege të vetme.

Neni 41. Kandidatët për kryetar partie, që i plotësojnë kushtet e parapara në nenin 40, kandidaturat e tyre, të mbështetura me dokumentacionin përkatës, i dorëzojnë deri te Komisioni për Organizimin e Kongresit, më së voni dy javë para mbajtjes së tij.

Neni 42. Kandidat i zgjedhur llogaritet ai që siguron më shumë se gjysmën e votave të delegatëve të pranishëm në Kongres, por jo më pak se 1/3 e numrit të përgjithshëm të delegatëve.

Neni 43. Votimi është i fshehtë ku çdo delegat ka në dispozicion vetëm një fletëvotimi. Kur kemi vetëm një kandidat, atëherë Kongresi mund të vendosë për zgjedhjen e Kryetarit të Partisë përmes votimit të hapur.

Neni 44. Nëse delegati rrethon dy ose më shumë emra të kandidatëve garues, fletëvotimi shpallet i pavlefshëm.

Neni 45. Nëse asnjëri nga kandidatët e mundshëm nuk siguron shumicën e nevojshme, votimi përsëritet midis dy kandidatëve më të votuar.

Neni 46. Kryetar partie zgjidhet kandidati i cili merr shumicën e votave prej atyre që marrin pjesë në votim, por jo më pak se 1/3 e numrit të përgjithshëm të delegatëve.

SHKARKIMI I KRYETARIT

Neni 47. Kryetarin e Partisë e shkarkon Kongresi me votat e 2/3-s së delegatëve të pranishëm në Kongres.

Neni 48. Iniciativë për ndërprerjen e mandatit të Kryetarit ndërmerr 2/3 e përbërjes së Kuvendit të Partisë.

Neni 49. Arsyeshmërinë juridike-statutare në lidhje me iniciativën për shkarkim e interpreton Komisioni Statutar.

Neni 50. Kryetari i Partisë shkarkohet në këto raste:

1. Shkelje e rëndë e Statutit dhe Platformës së Partisë,
2. Nëse dënohet me burgim për kryerjen e ndonjë vepre penale,
3. Në rast të dorëheqjes vullnetare,
4. Në rastet kur shëndeti i tij e pamundëson ta kryejë funksionin e Kryetarit.

Neni 51. Me punën e Kongresit ku vendoset për shkarkim të Kryetarit të Partisë, udhëheq Komisioni statutar.

Neni 52. Me votimin për shkarkimin e Kryetarit të Partisë, pushon mandati i tij.

Neni 53. Në të njëjtën seancë të Kongresit, zgjidhet Kryetari i ri i Partisë, sipas dispozitave të nenit 46 të Statutit.

Neni 54. Nëse Kongresi nuk e zgjedh Kryetarin e ri, ndërpritet puna e Kongresit dhe në afat prej 3 muajsh, përsëritet procedura për zgjedhjen e Kryetarit të Partisë sipas nenit 42 të Statutit.

Neni 55. Në rast të dorëheqjes së Kryetari të Partisë, atë e zëvendëson Kryetari i Kuvendit të Partisë, deri në zgjedhën e Kryetarit të ri në Kongresin e Jashtëzakonshëm i cili thirret jo më vonë se 3 muaj.

KUVENDI I PARTISË

Neni 56. Kuvendi i Partisë numëron nga 120-200 anëtarë.

Neni 57. Anëtarë të Kuvendit të Partisë sipas statusit momental janë edhe kryetarët e Degëve.

Neni 58. Anëtarë të Kuvendit të Partisë, sipas statusit momental janë edhe të gjithë funksionarët e lartë shtetërorë të Partisë: deputetët, ministrat, zv.ministrat dhe kryetarët e komunave.

Neni 59. Anëtarë të Kuvendit të Partisë janë: kryetarja e Asamblesë së Gruas dhe kryetari i Forumit Rinor.

Neni 60. Kuvendi i Partisë takohet më së paku një herë në 6 muaj.

Neni 61. Kuvendi merr vendime fuqiplote nëse në mbledhje marrin pjesë më shumë se 1/2 e përbërjes së tij, me përjashtim të rasteve kur parashihet ndryshe me këtë Statut.

Neni 62. Me mbledhjet e Kuvendit të Partisë kryeson Kryetari i Kuvendit.

Neni 63. Në rast pengese të Kryetarit të Kuvendit, me seancat e Kuvendit të Partisë udhëheq Sekretari i Përgjithshëm i Partisë.

Neni 64. Mbledhjet e jashtëzakonshme të Kuvendit të Partisë thirren sipas nevojës nga ana e Kryetarit të Kuvendit ose nga 2/3 e anëtarëve të Kuvendit të Partisë.

Neni 65. Sekretari organizativ ka obligim që në afat jo më vonë se shtatë ditë para mbajtjes së mbledhjes së Kuvendit të rregullt, anëtarët e Kuvendit të Partisë t'i pajisë me rendin e ditës dhe materialet e punës.

Neni 66. Kuvendi, në përputhje me rregulloren për punë të tij dhe përcaktimet statutare të Partisë, zgjedh trupat për punë të Kuvendit.

KOMPETENCAT E KUVENDIT TË PARTISË

Neni 67. Kuvendi i Partisë ka kompetencat vijuese:

1. Me propozim të Kryetarit të Partisë zgjedh dhe shkarkon anëtarët e Kryesisë së Partisë,
2. Me propozim të Kryetarit të Partisë zgjedh kryetarin e Akademisë,
3. Miraton Platformën e Partisë,
4. Debaton për çështje aktuale politike, juridike dhe socio-ekonomike dhe merr qëndrim rreth tyre,
5. Përkujdeset për realizimin e përcaktimeve programore të Partisë,
6. Përcakton propozim-raport për punën e Partisë që do t'i dorëzohet Kongresit,
7. Miraton planin financiar dhe llogarinë përfundimtare të Partisë,
8. Me propozim të Kryetarit të Partisë emëron Komisionin për çështje financiare të Partisë,
9. Miraton listat e kandidatëve për deputetë,
10. Miraton kandidaturat për kryetar komune,
11. Me propozim të Kryetarit të Partisë vendos për plotësimin e vendeve të zbrazura të Kuvendit të Partisë,

- 12.Me propozim të Kryetarit të Partisë sjell vendime për lidhje të bashkëpunimit me parti simotra jashtë vendit,
- 13.Sjell rregullore për funksionimin e vet,
- 14.Themelon komisione dhe trupa të tjerë punues,
- 15.Përcakton lartësinë e taksës së anëtarësisë, si dhe mënyrën e arkëtimit të saj,
- 16.Merr iniciativë për formimin e Asamblesë së Gruas,
- 17.Merr iniciativë për formimin e Forumit Rinor,
- 18.Kryen obligime të tjera të përcaktuara me këtë statut ose me autorizim të veçantë të Kongresit të Partisë.

KRYETARI I KUVENDIT TË PARTISË

Neni 68. Kryetari i Kuvendit të Partisë zgjidhet nga ana e Kuvendit të Partisë, me propozim të Kryetarit të Partisë.

Neni 69. Mandati i Kryetarit të Kuvendit të Partisë është 4 vjet.

Neni 70. Mandatin e Kryetarit të Kuvendit të Partisë e ndërpret Kuvendi i Partisë në raste të shkeljes së parimeve statutare, mosefikasitetit në kryerjen e detyrave dhe obligimeve, kur bie ndesh me Kodin etik të Partisë ose kur i njëjti burgoset për kryerjen e ndonjë vepre penale.

Neni 71. Detyrat dhe përgjegjësitë e Kryetarit të Kuvendit të Partisë:

- a) I thërret dhe i drejton mbledhjet e zakonshme dhe të jashtëzakonshme të Kuvendit të Partisë;
- b) Propozon krijimin e komisioneve dhe të grupeve të punës për zbatimin e vendimeve të Kuvendit të Partisë;
- c) Në koordinim me Kryetarin e Partisë, vendosin për pikat e rendit të ditës të mbledhjeve të Kuvendit të Partisë;
- d) Merr pjesë në mbledhjet e Kryesisë së Partisë me të drejtë vote.

KRYESIA E PARTISË

Neni 72. Kryesia e Partisë është organi më i lartë ekzekutiv i Partisë.

Neni 73. Kryesia e Partisë është organ politik-vendimmarrës.

Neni 74. Anëtarët e Kryesisë së Partisë zgjidhen nga ana e Kuvendit të Partisë me propozim të kryetarit të Partisë.

Neni 75. Në mbledhjet e Kryesisë së Partisë, sipas nevojës dhe pa të drejtë vote, marrin pjesë edhe deputetë, kryetarë komunash, funksionarë të caktuar shtetërorë, ministra, drejtorë të ndërmarrjeve publike etj.

Neni 76. Në përbërjen e Kryesisë së Partisë, sipas Statutit, me të drejtë të plotë vote bëjnë pjesë me automatizëm: Kryetari i Kuvendit, Kryetari i Akademisë, Kryetarja e Asamblesë së Gruas, si dhe Kryetari i Forumit Rinor.

Neni 77. Anëtarë të Kryesisë së Partisë nuk mund të jenë kryetarët e Degëve.

Neni 78. Kryesia e Partisë mban mbledhje sipas nevojës, por së paku 1 herë në dy muaj. Ajo sjell vendime të plotfuqishme nëse janë të pranishëm më së paku 1/2 e përbërjes së saj.

Neni 79. Mbledhjet e Kryesisë së Partisë i thirr Kryetari i Partisë, i cili njëherit edhe i kryeson ato. Në rast të pamundësisë së Kryetarit, me mbledhjen e Kryesisë së Partisë mund të kryesojë edhe njëri nga Nënkryetarët me autorizim të veçantë të Kryetarit të Partisë.

Neni 80. Sekretari organizativ ka për obligim më së voni pesë ditë pune para mbajtjes së mbledhjes, përveç në raste të veçanta, anëtarët e Kryesisë së Partisë t'i pajisë me rendin e ditës dhe materialet e punës.

Neni 81. Vendimet e Kryesisë së Partisë sillen me votat e shumicës së anëtarëve të pranishëm, me përjashtim të rasteve të veçanta të përcaktuara me dispozitat statutare.

Neni 82. Si raste të veçanta konsiderohen situatat e jashtëzakonshme në shtet, kur supozohet se një Degë e Partisë i ka shkelur rëndë parimet statutare, kur paraqitet nevojë e pashmangshme për përgjegjësi të ndonjë funksionari partiak dhe shtetëror etj.

Neni 83. Kryesia e Partisë, sipas nevojës, formon komisione dhe trupa punuese.

Neni 84. Në raste të veçanta Kryesinë e Partisë e zëvendëson Këshilli Drejtues në përbërje prej Kryetarit, Nënkryetarët, Sekretari i Përgjithshëm , Sekretari Organizativ dhe Kryetari i Kuvendit të Partisë. Kryetari i Partisë në mbledhjen e radhës e informon Kryesinë e Partisë për aktivitetet e kryera dhe arsyeshmërinë për mbajtjen e mbledhjes së Këshillit Drejtues. Këshilli Drejtues mbledhet në baza javore për ndjekjen e zhvillimeve politike.

Neni 85. Mënyra e punës së Kryesisë së Partisë përcaktohet me Rregulloren e punës së Kryesisë së Partisë.

KOMPETENCAT E KRYESISË SË PARTISË

Neni 86. Kryesia e Partisë ka kompetencat në vijim:

- Përkujdeset për implementim të vendimeve të marra nga Kuvendi i Partisë,
- Debaton në lidhje me Platformën e Partisë,
- Propozon ndryshime të Statutit të Partisë,
- Propozon ndryshim të Programit të Partisë,
- Kryesia e Partisë ia propozon Kuvendit të Partisë listën e kandidatëve të mundshëm për deputetë.
- Kryesia e Partisë ia propozon Kuvendit të Partisë kandidatët e mundshëm për kryetarë komune.
- I ndërton dhe implementon qëndrimet politike të Partisë.
- Bën emërim të bartësve të funksioneve shtetërore.
- Mban llogari për respektim të dispozitave të Kodeksit etik të Partisë.
- Vendos për çështje të tjera në përputhje me këtë Statut.
- Kryen obligime të tjera të deleguara nga ana e Kuvendit të Partisë.

SHKARIMI I PARAKOHSHËM I ANËTARËVE TË KRYESISË

Neni 87. Anëtarët e Kryesisë së Partisë mund të shkarkohen edhe para skadimit të mandatit:

1. Nëse anëtari i Kryesisë së Partisë bie ndesh me Statutin, Platformën dhe politikat e Partisë,
2. Nëse anëtari i Kryesisë së Partisë dënohet për kryerjen e ndonjë vepre penale,
3. Nëse anëtari i Kryesisë së Partisë bie ndesh me Kodeksin etik të Partisë,
4. Nëse anëtari i Kryesisë së Partisë për shkaqe shëndetësore nuk mund t'i kryejë obligimet partiake.

Neni 88. Komisioni statutar mund të japë vlerësim, bazuar në Statut, për shkarkim të anëtarit të Kryesisë së Partisë me kërkesë të këtij të fundit, në rastet kur behet fjalë për shkelje statutare dhe shkelje të Platformës.

Neni 89. Zgjedhja e anëtarit/ve të rinj të Kryesisë së Partisë bëhet sipas procedurave statutare në mbledhjen e radhës të Kuvendit të Partisë.

SEKRETARI I PËRGJITHSHËM

Neni 90. Sekretarin e Përgjithshëm e zgjedh Kuvendi i Partisë, me propozim të Kryetarit të Partisë, nëse për të votojnë më shumë se gjysma e anëtarëve të pranishëm.

Neni 91. Mandati i Sekretarit të Përgjithshëm zgjat 4 vjet, me të drejtë rizgjedhjeje.

Neni 92. Sekretari i Përgjithshëm kryen obligimet e parapara me këtë Statut dhe rregulloren për aktivitetet e Sekretarit të Përgjithshëm.

Neni 93. Sekretarit i Përgjithshëm shkarkohet nga kjo pozitë nëse bën shkelje të Statutit dhe Platformës së Partisë, nëse vullnetarisht jep dorëheqje, nëse dënohet me burgim për kryerjen e ndonjë vepre penale dhe nëse gjendja shëndetësore nuk i mundëson kryerjen e funksionit.

Neni 94. Sekretari i Përgjithshëm shkarkohet me propozim të Kryetarit të Partisë, nëse për shkarkimin e tij votojnë më shumë se gjysma e anëtarëve të pranishëm.

Neni 95. Sekretari i Përgjithshëm është përgjegjës për organizimin e Partisë, si dhe për funksionimin e përditshëm të saj:

1. Merr pjesë në krijimin e politikave të Partisë;
2. Ndjek dhe përgjigjet për zbatimin e Statutit, vendimeve të miratuara nga Kongresi, si dhe rregulloreve e udhëzimeve të forumeve drejtuese të Partisë;
3. Pas çdo mbledhjeje të Kryesisë së Partisë, i mbledh kryetarët e Degëve për t'i informuar për vendimet e Kryesisë;
4. I ndihmon dhe i kontrollon organet drejtuese të strukturave vendore të Partisë për zbatimin e vendimeve të Kryesisë;
5. Mban evidencën e të dhënave të regjistrit të anëtarësisë së Partisë;
6. Kujdeset për mbarëvajtjen financiare të Partisë dhe
7. Udhëzon Sekretarin organizativ për realizimin e aktiviteteve.

SEKRETARI I ORGANIZATIV

Neni 96. Sekretarin organizativ e zgjedh Kuvendi i Partisë me propozim të Kryetarit të Partisë.

Neni 97. Mandati i Sekretarit organizativ zgjat 4 vjet, me të drejtë rizgjedhjeje;

Neni 98. Mandatin e Sekretarit organizativ e ndërpret Kryetari i Partisë në raste të shkeljes së parimeve statutare, mosefikasitetit në kryerjen e detyrave dhe obligimeve ose kur i njëjti burgoset për kryerjen e ndonjë vepre penale.

Neni 99. Sekretari organizativ shkarkohet me propozim të Kryetarit të Partisë, nëse për shkarkimin e tij votojnë më shumë se gjysma e anëtarëve të pranishëm.

Neni 100. Sekretari organizativ:

1. Organizon mbledhjet e Kuvendit dhe Kryesisë së Partisë;
2. I zbaton të gjitha vendimet që i merr nga Kryetari ose Kryesia e Partisë për çështjet organizative;
3. Kujdeset për forcimin organizativ të Partisë;
4. E mbikëqyr punën e Degëve të Partisë dhe raporton për to në mbledhjet e Kryesisë;

5. Krijon grupe nismëtare që punojnë drejt themelimit të një njësie bazë të Partisë;
6. Krijon grupe pune për ristrukturim;
7. Krijon komunikim mes formave të ndryshme të organizuara në Parti;
8. Raporton për punën e kryer te Kryetari i Partisë dhe në mbledhjet e Kryesisë.

NËNKRYETARI I PARTISË

Neni 101. Nënkyetarin e Partisë e zgjedh Kuvendi i Partisë me propozim të Kryetarit të Partisë.

Neni 102. Numrin e nënkryetarëve e përcakton kryetari sipas nevojave konkrete në terren.

Neni 103. Mandati i Nënkyetarit ndërlidhet me mandatin e Kryetarit të Partisë.

Neni 104. Mandatin e Nënkyetarit e ndërpret Kryetari i Partisë në raste të shkeljes së parimeve statutare, mosefikasitetit në kryerjen e detyrave dhe obligimeve, kur Nënkyetari bie ndesh me Kodeksin etik të Partisë ose kur i njëjti burgoset për kryerjen e ndonjë vepre penale.

Neni 105. Nënkyetari i Partisë merr pjesë në krijimin e politikave të Partisë;

Neni 106. Kujdeset për promovimin e politikave të Partisë përpara grupeve të ndryshme të interesit në shoqëri;

Neni 107. E zëvendëson Kryetarin e Partisë, në mungesë të tij, me autorizim paraprak nga kryetari i Partisë;

Neni 108. Kryen edhe detyra të tjera, me autorizim nga Kryetari i Partisë.

Grupi Parlamentar

Neni 109. Grupin Parlamentar e përbëjnë përfaqësuesit e zgjedhur të ASH-së në Kuvendin e Republikës së Maqedonisë së Veriut.

Neni 110. Grupi Parlamentar:

- Implementon politikat e ASH-së në Kuvendin e Republikës së Maqedonisë së Veriut;
- Shqyrton të gjitha çështjet parlamentare dhe inicion aktivitete ligjvënëse;
- Bashkërendon marrjen e vendimeve në harmoni me politikat e ASH-së, të adresuara nga Kryetari dhe Kryesia.

AKADEMIA

Neni 111. Akademia është organ strategjik-këshillëdhënës i Partisë.

Neni 112. Në mbledhjet e Akademisë me të drejta të plota marrin pjesë Kryetari i Partisë, Kryetari i Kuvendit, Sekretari i Përgjithshëm, Sekretari Organizativ, Kryetarja e Asamblesë së Gruas dhe kryetari i Forumit Rinor.

Neni 113. Anëtarët e Akademisë i propozon Kryetari i Partisë, në bashkëpunim me kryetarin e Akademisë.

Neni 114. Mandati i kryetarit të Akademisë zgjat katër vjet, me të drejtë edhe për një rizgjedhje.

Neni 115. Për kryetar Akademie mund të zgjidhet personi që është dëshmuar me veprimtarinë e tij teorike-shkencore dhe praktike.

Neni 116. Kryetari i Akademisë zgjidhet nëse për të votojnë më shumë se gjysma e kuvendarëve të pranishëm.

Neni 117. Mandati i kryetarit të Akademisë ndërpritet edhe para kohe nëse puna e tij bie ndesh me Statutin dhe Platformën e Partisë, kur bie ndesh me Kodeksin e Partisë, nëse dënohet për kryerjen e ndonjë vepre penale, ose kur gjendja shëndetësore nuk i mundëson ta kryejë funksionin e besuar.

Neni 118. Propozimin për shkarkim të kryetarit të Akademisë e bëjnë Kryetari i Partisë ose 2/3 e anëtareve të Akademisë.

Neni 119. Kryetarin e Akademisë e shkarkon Kuvendi i Partisë nëse për shkarkim votojnë më shumë se gjysma e kuvendarëve të pranishëm.

Neni 120. Mandati i anëtarëve të Akademisë është i pakufizuar dhe zgjat përderisa Kryetari i Partisë dhe kryetari i Akademisë konstatojnë se i njëjti nuk është në gjendje të ofrojë atë që Partia pret nga ai.

Neni 121. Anëtarëve të Akademisë u ndërpritet mandati edhe në rastet kur mungojnë në mbledhje 3 herë me radhë pa ndonjë arsyetim.

Neni 122. Anëtar i Akademisë me automatizëm bëhet çdo kryetar dhe sekretar i përgjithshëm i Partisë, të cilit i skadon mandati.

Neni 123. Mbledhjet e Akademisë zhvillohen sipas nevojës, por së paku 1 herë në dy muaj me iniciativë të kryetarit të Akademisë ose Kryetarit të Partisë.

Neni 124. Aktivitet parësor i Akademisë është ndërtimi i politikave strategjike për veprim të Partisë në të gjitha nivelet. Ajo i përgatit të gjitha aktet normative, duke filluar prej Statutit, Platformës, Strategjisë afatshkurte, afatmesme, afatgjate etj.

Neni 125. Akademia ka për obligim t'i ndihmojë profesionalisht, në të gjitha aspektet, bartësit e funksioneve nga radhët e Aleancës për Shqiptarët.

QENDRA ANALITIKE

Neni 126. Në kuadër të Partisë funksionon Qendra analitike e Aleancës për Shqiptarët.

Neni 127. Qendra analitike është njësi kërkimore, e cila përpilon raporte, analiza dhe propozon masa për përmirësimin e politikave të Partisë;

Neni 128. Analizon të dhënat e rezultateve të dala nga zgjedhjet, duke i krahasuar me rezultatet paraprake.

Neni 129. Qendra analitike organizon sondazhe për nevojat e Partisë.

Neni 130. Qendra analitike bën vlerësimin e politikave publike, monitoron zhvillimin e proceseve politike dhe zgjedhore.

Neni 131. Qendra analitike sistematizon të dhënat nga sondazhet politike, përpunon të dhënat e karakterit politik, ekonomik, social, ndëretnik, ndërkulturor, konfesional, të sigurisë etj.

Neni 132. Qendra analitike rezultatet nga analizat e bëra, raportet dhe vlerësimet, i dërgon deri te Kryesia e Partisë.

Neni 133. Qendra analitike, për një efikasitet sa më të lartë, zhvillon bashkëpunim edhe me ekspertë të dalluar jashtë radhëve partiake dhe jashtë RMV-së.

ASAMBLEJA E GRUAS

Neni 134. Asambleja e Gruas e Aleancës për Shqiptarët është organizatë politike e vajzave dhe grave, anëtare dhe simpatizante të Aleancës për Shqiptarët.

Neni 135. Kryetarja e Asamblesë së Gruas zgjidhet me mandat 4-vjeçar, me të drejtë rizgjedhjeje.

Neni 136. Kryetarja e Asamblesë së Gruas paraqet raport për aktivitetet e realizuara dhe të planifikuara çdo 6 muaj përpara Kuvendit të Partisë.

Neni 137. Organizimi, funksionimi, si dhe mënyra e zgjedhjes dhe shkarkimit të bartësve të funksioneve të Asamblesë së Gruas rregullohen me rregullore të veçantë, të bazuar në parimet themelore të Statutit.

FORUMI RINOR

Neni 138. Forumi Rinor i Aleancës për Shqiptarët është organizatë politike e të rinjëve, anëtarë dhe simpatizantë të Aleancës për Shqiptarët.

Neni 139. Mandati i kryetarit të Forumit Rinor zgjat 4 vjet, me të drejtë rizgjedhjeje.

Neni 140. Kryetari i Forumit Rinor paraqet raport për aktivitetet e realizuara dhe të planifikuara çdo 6 muaj përpara Kuvendit të Partisë.

Neni 141. Organizimi, funksionimi, mënyra e zgjedhjes dhe shkarkimit të bartësve të funksioneve të Forumit Rinor rregullohen me rregullore të veçantë, të bazuar në parimet e Statutit.

KËSHILLI MBIKQYRËS

Neni 142. Këshilli mbikëqyrës përbëhet nga 5 anëtarë, të cilët janë anëtarë të Kuvendit të Partisë, ndërsa nuk janë të përfaqësuar në Kryesinë e Partisë. Antarët e Këshillit Mbikëqyrës zgjidhen nga Kuvendi i Partisë, me shumicën e votave të kuvendarëve të pranishëm.

Neni 143. Këshilli mbikëqyrës mbikëqyr punën administrative të Kryesisë së Partisë. Për punën administrative dhe punët financiare i jep raport Kuvendit të Partisë 1 herë në vit.

KOMISIONI STATUTAR

Neni 144. Komisionin statutar e zgjedh Kuvendi i Partisë me shumicën e votave të kuvendarëve të pranishëm .

Neni 145. Komisioni statutar përbëhet nga kryetari i komisionit dhe 4 anëtarë të komisionit të propozuar nga Kryetari i Partisë, në bashkëpunim me Sekretarin e Përgjithshëm.

Neni 146. Komisioni statutar ndjek zgjedhjet brendapartiake në të gjitha nivelet.

Neni 147. Komisioni statutar intervenon nëse ka shkelje statutare.

Neni 148. Komisioni statutar ka për detyrë t'i interpretojë dispozitat e Statutit. Në rast nevojë angazhohen ekspertë të fushës nga jashtë.

SHKARKIMI I PARAKOHSHËM

Neni 149. Anëtari i Komisionit statutar mund të shkarkohet nëse:

1. Burgoset për shkak të kryerjes të ndonjë vepre penale,
2. Bie ndesh me Kodin etik të Partisë,
3. Ka probleme shëndetësore që pengojnë kryerjen e obligimeve.

Neni 150. Propozimin për shkarkim të anëtarit të Komisionit statutar e jep Kryetari i Partisë në konsultim me Sekretarin e Përgjithshëm.

Neni 151. Anëtarët e Komisionit statutar shkarkohen nëse për shkarkimin e tyre votojnë më shumë se gjysma e kuvendarëve të pranishëm.

KOMISIONI I KUADROVE TË PARTISË

Neni 152. Komisioni i kuadrove të Partisë, përbëhet nga Kryetari i Partisë, Nënkryetari i Partisë, Sekretari i Përgjithshëm, Sekretari Organizativ, Kryetari i Kuvendit të Partisë, Kryetarja e Asamblesë së Gruas dhe Kryetari i Forumit Rinor.

Neni 153. Në mbledhjet e komisionit të kuadrove të Partisë merr pjesë edhe Kryetari i Degës gjegjëse kur bëhet fjalë për propozimin e ndonjë funksionari në ekzekutiv që graviton nga dega e tij.

Neni 154. Komisioni i kuadrove të Partisë vendimet i sjell me shumicë të votave të anëtarëve të pranishëm.

Neni 155. Funksionarët e emëruar çdo 6 muaj dërgojnë raport me shkrim deri te Komisioni i kuadrove të Partisë për aktivitetet e tyre në drejtim të zbatimit të Platformës së Partisë.

Neni 156. Komisioni i kuadrove të Partisë pas analizës së detajuar i propozon Kryesisë së Partisë vazhdimin, gjegjësisht ndërprerjen e mandatit të mëtutjeshëm të funksionarëve të emëruar nga Aleanca për Shqiptarët.

DEGA

Neni 157. Dega e Partisë përfshin të gjithë anëtarët e Partisë që kanë rezidencë në territorin e një komune.

Neni 158. Territori i Degës përcaktohet sipas ndarjes territoriale të Republikës së Maqedonisë së Veriut.

Neni 159. Dega e Partisë ka organet në vijim:

1. Kuvendi i Degës
2. Kryetari i Degës
3. Kryesia e Degës
4. Sekretari i Degës
5. Këshilli mbikëqyrës
6. Komisioni i kuadrove të Degës.

KËSHILLI I DEGËVE TË SHKUPIT

Neni 160. Në Këshillin e Degëve të Shkupit, përfshihen të gjitha degët e Partisë që bëjnë pjesë në kuadër të qytetit të Shkupit.

Neni 161. Këshilli i Degëve të Shkupit është organ koordinues i aktiviteteve të Degëve të Shkupit të ASH-së.

Neni 162. Këshilli i Degëve të Shkupit mblidhet sa herë që paraqitet nevoja, nën drejtimin e Kryesuesit të Këshillit të Degëve, i emëruar nga Kryetari i Partisë.

Neni 163. Kompetencat e Këshillit të Degëve të Shkupit janë:

1. Diskuton për çështjet që lidhen me probleme të qeverisjes lokale në nivel qyteti;
2. Propozon e merr veprime për përsosjen e organizimit e të veprimit elektorale në nivel të qytetit të Shkupit, gjatë zgjedhjeve lokale;
3. Propozon përfaqësuesit e saj të zgjedhur në qeverisjen vendore në nivel të qytetit;
4. Koordinon aktivitetin e këshilltarëve të ASH-së në Këshillin e qytetit të Shkupit.

Neni 164. Anëtarët e Këshillit të Degëve të Shkupit janë:

1. Anëtarët e Kryesisë së Partisë, përfaqësues nga Degët e Shkupit;
2. Kryetarët e Degëve të Partisë në kuadër të qytetit të Shkupit;
3. Deputetët që kanë bazën e tyre në njërin nga Degët e Shkupit;
4. Kryetarët e komunave të Shkupit (anëtarë partie);
5. Këshilltarët e Kuvendit të qytetit të Shkupit;
6. Përfaqësuesit e emëruar në institucionet dhe ndërmarrjet në kuadër të qytetit të Shkupit;
7. Një përfaqësues nga Asambleja e Gruas dhe Forumi Rinor.

NËNDEGA

Neni 165. Nëndega e përfshin anëtarësinë e një regjioni të caktuar gjeografik.

Neni 166. Nëndega numëron minimum 21 anëtarë.

Neni 167. Partia ka Nëndegë në fshatra dhe Nëndegë në qytet.

Neni 168. Nëndega e fshatit përfshin tërë territorin gjeografik të fshatit.

Neni 169. Territori i Nëndegëve në qytet, përcaktohet sipas ndarjes territoriale të qytetit.

Neni 170. Organet e Nëndegës janë:

1. Kuvendi i Nëndegës,
2. Kryetari i Nëndegës dhe
3. Kryesia e Nëndegës

Neni 171. Mënyra e punës së Kuvendit dhe Kryesisë së Degëve dhe Nëndegëve përcaktohet me Rregulloren të veçantë.

KËSHILLI I VENDVOTIMIT

Neni 172. Këshilli i vendvotimit

1. Këshilli i vendvotimit është njësia bazë e Partisë;
2. Këshilli i vendvotimit përbëhet më së paku prej 3 anëtarësh;
3. Këshilli i vendvotimit duhet të pasqyrojë barazinë gjinore dhe rininë;
4. Anëtarët e këshillit të vendvotimit gjatë proceseve zgjedhore janë anëtarë komisioni zgjedhor ose vëzhgues në vendvotimin ku jetojnë dhe veprojnë.

PËRFITIMI DHE MENAXHIMI ME MJETET E PARTISË

Neni 173. Me qëllim të realizimit të synimeve të Partisë, Partia fiton dhe disponon me mjete dhe të drejta mbi mjetet në përputhje me rregullativën më të gjerë juridike, me ligjin për financim të partive politike, si dhe me Statut.

Neni 174. Partia realizon mjetet financiare, sende dhe të mira materiale, të cilat mund të burojnë nga burime publike dhe burime private.

Neni 175. Burimet publike janë mjete financiare të parapara me buxhetin e Republikës së Maqedonisë së Veriut, në përputhje me Ligjin për financim të partive politike.

Neni 176. Burime private të financimit të Partisë politike janë burimet nga anëtarësia, dhuratat, legatët, sponsorimet, dotacionet dhe burimet e tjera në përputhje me Ligjin për financim të partive politike.

Neni 177. Mjetet, të drejtat e sipërpërmendura, mund të shfrytëzohen në përputhje me planet financiare të përcaktuara dhe miratuara me dokumente përkatëse.

Neni 178. Kryetari i Partisë është realizues dhe urdhërues për realizim të planit financiar në saje të të drejtave dhe obligimeve të përcaktuara me ligj dhe Statut, ndërsa atë e zëvendëson Nënkryetari i autorizuar në rastet kur lind nevoja për një gjë të tillë.

Neni 179. Partia mban evidencë financiare-kontabël lidhur me punën e vet materiale-financiare, e cila mbahet në përputhje me dispozitat e Ligjit për kontabilitet për organizatat jofitimprurëse.

Neni 180. Në rastet e shuarjes së Partisë nga cilatdo shkaqe ligjore ose shkaqe të përcaktuara me këtë Statut, pas përmbushjes së obligimeve të Partisë, mjetet e mbetura kalojnë në pronësi të Muzeut të Alfabetit të Gjuhës Shqipe në Manastir.

DISPOZITAT E VEÇANTA

FRAKSIONET PARTIAKE

Neni 181. Aleanca për Shqiptarët, për shkak të ndërtimit të një niveli sa më të lartë të demokracisë së brendshme, mundëson veprimin e fraksioneve partiake brenda saj.

Neni 182. Aktiviteti i fraksioneve partiake nuk guxon të jetë në kundërshtim me idetë themelore të Partisë.

Neni 183. Fraksionet partiake lirshëm mund të veprojnë edhe për arritjen e qëllimeve që janë në kundërshtim me politikat aktuale të organeve më të larta të Partisë me qëllim të avancimit të demokracisë së brendshme dhe homogjenizimit sa me të lartë të Aleancës për Shqiptarët.

Neni 184. Fraksionet partiake mund të formohen në baza gjinore, grupmoshave, në baza profesionale, rajonale etj.

Neni 185. Fraksionin e përbëjnë më së paku 20% e anëtarëve të Kuvendit të Partisë.

Neni 186. Një anëtar i Kuvendit të Partisë nuk mund të jetë pjesë e më tepër se një fraksioni.

Neni 187. Fraksionet i shprehin bindjet e veta përmes liderit formal të tyre.

Neni 188. Aspektin statutar-juridik të krijimit të kushteve për formim të një fraksioni partiak e vlerëson Komisioni statutar.

Neni 189. Komisioni statutar e ndjek në vazhdimësi aktivitetin e fraksioneve brendapartiake dhe ndërpret aktivitetin e tyre në raste kur fraksioni partiak e dëmton bindshëm idenë bazë të Partisë në përgjithësi.

SHKOLLA E KUADROVE

Neni 190. Për hir të ndërtimit të një politike sa më të qëndrueshme dhe kompetente, Partia duhet të krijojë kushte për veprimin e shkollës së kuadrove.

Neni 191. Shkolla e kuadrove do të veprojë në bazë të një rregulloreje të veçantë, të përpiluar nga Akademia e ASH-së.

DISPOZITAT KALIMTARE DHE PËRFUNDIMTARE

Neni 192. Në rast të mosdorëzimit të vulave dhe dokumenteve përkatëse të Partisë nga përbërja e kaluar, si dhe në rast të pengesave juridike në lidhje me drejtimin e Partisë, Kongresi i Partisë i jep autorizime fuqiplote Kuvendit të Partisë për hapat e mëtejshme.

Neni 193. Në rast të pengesave të përmendura në nenin 192, Kuvendi i Partisë obligohet që në afat sa më të shkurtër kohor, të kryejë regjistrimin e subjektit të ri, duke ruajtur trashëgiminë politike dhe historike të Aleancës për Shqiptarët, po ashtu në të njëjtën kohë t'i kryejë të gjitha procedurat e nevojshme ligjore që lidhen me emrin, stemën dhe flamurin e subjektit të ri, të përcaktuara në nenet 3, 4 dhe 6 të këtij Statuti.

Neni 194. Ky statut hyn në fuqi në ditën e sjelljes, ndërsa teksti i konsoliduar me plotësim-ndryshimet deponohet në Gjykatë.